

# Cart De'en Bzoj San Pabən' Par Beṇə' Galasia Ca'

Pabən' chguape' diox beṇə' ca'  
chso'elao' Cristən' Galasian'

**1** <sup>1-2</sup>Nada' Pab chzoja' le'e chdopə  
chžagle cho'ela'ole Cristən' yež  
ca' de'en zjəchi' gan' nzi' Galasia.  
Chguapto' le'e diox txen len yoguə'  
beṇə' bišə'əcho ca' nitə' nga. Caguə  
beṇəch na'anə' gwlej nada' o bsele'e  
nada' par naca' apostol. Jesocristən'  
txen len Xə' Diozən' ben' bosban  
le' ladjo beṇə' guat ca', lega'aque'en  
gosə'əbeje' nada' par naca' apostol.  
<sup>3</sup>Chona' orasyon par niç Xacho  
Diozən' na' Xancho Jesocristən'  
əsa'aclene' le'e na' so'one' ca so  
cuezle binlo len xbab de'en yo'o  
lo'o yichjla'ažda'olen'. <sup>4</sup>Beṇə' ca' ža'  
yežlyo nga tyemp nga zocho ṇa'a  
nite'e xni'a de'e malən'. Jesocristən'  
bnežjw cuine' gwsot beṇə' le'  
par gwdixjue' xtolə'əchon' niç  
ca' bebeje' chio'o xni'a de'e malən'.  
Bene' ca' chedə' can' gwyazlažə'  
Xacho Diozən' gone'. <sup>5</sup>Ledoye'ela'och  
Diozən' zejlicane. Can' gonggacžcho.

**Bitoch bi dižə' de de'e guac  
əṇacho dižə' güen dižə' cobə**

<sup>6</sup>Diozən' gwleje' le'e par niç  
Xi'ine' Cristən' chaclene' le'e. Na'

chebanda' can' chonlen' lgüegwə  
bachbejyichjle Diozən'. Na'  
lgu'a de'e gwzenagle dižə' güen  
dižə' cobə de'en chzejni'in che  
Jesocristən' de'en be'elena' le'e,  
bachzenagzechle che yeto de'en  
chaquele naquə dižə' güen dižə'  
cobə. <sup>7</sup>Pero bito naquən dižə' güen  
dižə' cobə. Beṇə' ca' choso'osed  
choso'olo'ine' to de'e zda clelə  
na' chso'one' ca chaczejlažə'əle  
che de'en bsed əblo'ito' le'e. <sup>8</sup>Žalə'  
neto' əchyixjue'eto' yeto de'en bito  
naquən lebe len dižə' güen dižə'  
cobə de'en chzejni'in che Cristən'  
de'en babsed bablo'ito' le'e, Diozən'  
gone' par niç cuiayi'ito' zejlicane,  
na' la'anə' to angl beṇə' za' yoban'  
chixjui'e xtižə' Cristən' clelə, leczə  
cuiayi'e. <sup>9</sup>Can' bagwnia' antslə,  
leczə can' chnia' ṇa'a. Notə'ətezə  
beṇə' chixjui'e de'en bito naquən  
lebe len dižə' güen dižə' cobə de'en  
chzejni'in che Cristən' de'en babsed  
blo'ito' le'e, Diozən' gone' par niç  
cuiayi'e zejlicane.

<sup>10</sup>Echnia' ca' par niç yebei  
Diozən' len nada', caguə par niç  
yebei beṇəchən' nada', na' caguə  
par so'olažə'e can' chona' na'anə'.  
Žalə' chi' yichja' naclə gona' par

nich so'olažə' beṇačən' can' chona'  
bito chzenaga' che Cristən' žalə' ca'.

**Diozən' gwleje' Pabən'  
par goque' apostol**

<sup>11</sup>Beṇə' bišə', che'enda' ənezele  
de que dižə' güen dižə' cobə de'len  
chzejni'in che Cristən' de'len  
babe'elena' le'e bito naquən xbab  
che beṇačh. <sup>12</sup>Caguə beṇačh  
na'anə' bzenene' nada' dižə'  
güen dižə' cobə de'len chzejni'in  
che Jesocristən' na' nique  
əṇacho beṇačh na'anə' bene' ca  
gweyjejni'ichda'an. Cuin Jesocristən'  
bzejni'ine' nada' dižə' güen dižə'  
cobən'.

<sup>13</sup>Babenczele dižə' can' bena'  
antslə catə'an ne'e naogua'  
costombr che neto' beṇə' Izrael.  
Lechgualə blagzejə blagzida'  
beṇə' ca' chso'onlilažə' Cristən',  
go'onda' yonitlaoga'aca'ane'. <sup>14</sup>Na'  
gwche'echgua' yichja' che costombr  
de'len gosə'ənao de'e xaxta'ogua'a  
ca' can' gwse'ejni'alaže'e  
Diozən', na' bichlə de'len  
gwso'one' gwsa'aque' par yebei  
Diozən' lega'aque' laogüe de'len  
gosə'ənaogüe'en. Bsedəcha' de'e ca'  
mazəchlə can' boso'osed zan beṇə'  
Izrael ljuežja' ca' beṇə' ca' gwsa'alja  
ca tyempən' golja'anə'. <sup>15</sup>Catə'  
cuiṇə' galja' Diozən' bsi'e xneze  
gona' xšine'enə'. Gwleje' nada' par  
gona'an chedə' nzi'ilaže'e nada'.  
<sup>16</sup>Na' catə' bžin ža ben Diozən'  
can' gwchoglaogüe'en gone', nach  
bzejni'ine' nada' de que Jeso'osən'  
naque' Xi'ine'. Bzejni'ine' nada'  
par nich chjətixjui'a xtiže'enə' len  
beṇə' ca' cui zjənaquə beṇə' Izrael.  
Na' dezd ža na' notono gwṇabda'

əgwzejni'ine'en nada'. <sup>17</sup>Na' nic  
gwy'a'a Jerosalennə' par nich beṇə'  
ca' zjənaquə apostol antslə ca nada'  
yoso'osed yoso'olo'ine' nada' che  
Jeso'osən'. Zgualatec gwy'a'a gan'  
nzi' Arabia, na' Arabia na' beza'a  
bežina' Damascon'.

<sup>18</sup>Gwde šon iz gwy'a'a Damascon'  
nach gwy'a'a Jerosalennə' jəlanə'a  
Bedən' na' jsoa' len le' žda'obiž.

<sup>19</sup>Pero bito bžaga' apostol ca'  
yeļa' sino tozə Jacob beṇə' bišə'  
Xanchon'. <sup>20</sup>Nezcze Diozən' de que  
de'e nga chzoja' le'e naquən de'e li.

<sup>21</sup>Nach gwy'a'a yež ca' zjəchi'  
gan' nzi' Siria na' Silisia. <sup>22</sup>Na'  
ca naquə beṇə' ca' chesə'ədopə  
chesə'əžag chso'elaogüe'e Cristən'  
yež ca' zjəchi' gan' nzi' Jodea,  
bitonə' so'ombi'e nada' ca orən'.  
<sup>23</sup>Con bazjənenene' rson de que  
bitoch chlagzejə chlagzida' beṇə' ca'  
chso'onlilažə' Cristən' na' de que  
bachyixjui'a xtiže'enə', len antslə  
go'onda' gona' ca yesə'əbejyichj  
beṇə' ca' len. <sup>24</sup>Na' beṇə' Jodea  
ca' chso'onlilažə' Cristən'  
gwso'ela'oche' Diozən' de'len  
bachonlilaža'a Cristən'.

**Apostol ca' yeļa' gwza'azlaže'e  
can' ben Pabən'**

**2** Na' gwde žda' iz gwy'a'a  
Jerosalennə' nach gwy'a'a  
de'e yoblə len Bernaben', na'  
leczə gwchi'a Titon'. <sup>2</sup>Diozən'  
bene' mendad ša'a, na' de'e  
na'anə' gwy'a'a. Na' btoba' beṇə'  
ca' zjənaquə blao entr beṇə' ca'  
chso'elao' Cristən' Jerosalennə'  
na' lega'acze' bzejni'ida' bin'  
chyixjui'a len beṇə' ca' cui  
zjənaquə beṇə' Izrael catə'an

cho'elena' lega'aque' dižə' güen dižə' cobə de'en chzejni'in che Cristən'. Bzejni'iga'acda'ane' bin' chsed chlo'ida' chedə' go'onnda' əsa'azlaže'e de'en chsed chlo'ida' beṇə' ca' par niç ca' cui yesə'əne' de que bito bi zaquə' de'en chona' na' de'en babena'. <sup>3</sup>Ca goquən' bito cholə gwso'one' byen so beṇə' ljuežja' Titon' seṇy de'en ne' sirconsision, la'anə'əczə cui naque' beṇə' Izrael. <sup>4</sup>Goc ca' la'anə'əczə gwnitə' beṇə' gosə'əne' cheyalə' soe' seṇyən'. Gwnitə' beṇə' gosə'əlen beṇə' bišə'əcho ca' Jerosalennə' ca orən', parzə niç yesə'əgüie' šə naoto' costombr ca' de'en nyoç le'e lei che neto' beṇə' Izrael. Gwse'enene' gwso'one' byen yoguə' beṇə' so'onlilaže'e Cristən' yesə'ənaogüie' costombr ca' len la' nezecho chebei Diozən' chio'lo por ni che de'en chonlilažə'əcho Cristən', caguə por ni che šə choncho complir bi de'en na lein'. <sup>5</sup>Pero nada' na' Bernaben' ni latə'əzə bito bzenagto' che beṇə' ca'. Con gwzochechtezəto' bento' par niç gaquə talenchle dižə' güen dižə' cobə de'en chzejni'in che Cristən' de'en babe'elento' le'e na' de'en naquə de'e li, sin cui bi bichlə gonle.

<sup>6</sup>Na' beṇə' ca' gwsa'ac blaə entr beṇə' ca' chso'onlilažə' Cristən' Jerosalennə', bito gwse'enene' gwša'a can' chsed chlo'ida' che Cristən'. Enia' ca' la'anə'əczə bito bi nonən len nada' šə gwsa'aque' beṇə' blaə o šə cui gwsa'aque', la' par len Diozən' tozəczə can' zaquə' yoguə'əloj beṇə'. <sup>7</sup>Gwsa'acbe'ine' de que Diozən' ngüie'e lao na'a

əchyixjui'a dižə' güen dižə' cobə de'en chzejni'in che Cristən' len beṇə' ca' cui zjənaquə beṇə' Izrael can' ngüie'en lao na' Bedən' chyixjui'en len beṇə' Izrael gwlaž cheto' ca'. <sup>8</sup>Diozən' len yelə' guac che'enə' chaclene' Bedən' par niç chyixjui'e xtižə' Cristən' len beṇə' Izrael gwlaž cheto' ca'. Na' lecze'enə' chaclene' nada' len yelə' guac che'enə' par niç əchyixjui'a xtižə' Cristən' len beṇə' ca' cui zjənaquə beṇə' Izrael.

<sup>9</sup>Jacobən' len Bedən' na' len Juannə' zjənaquəche' beṇə' blaə entr beṇə' ca' chəsə'ədopə chəsə'əžag chso'elaogüie'e Cristən' Jerosalennə'. Na' catə' lega'aque' gwsa'acbe'ine' can' chaclen Diozən' nada' par chona' xšine'enə' nach gwso'oxe'e na'anə' len na' Bernaben' par bosə'olo'e de que chsa'azlaže'e can' chonto' txen len lega'aque'. Na' gwsa'aque' güenczən' gonto' xšin Diozən' entr beṇə' ca' cui zjənaquə beṇə' Izrael na' lega'aque' so'one'en entr beṇə' Izrael gwlaž cheto' ca'. <sup>10</sup>Tozə de'en gwse'e neto' gonto', gaquələnto' beṇə' yašə' ca' chso'eləo' Cristən'. Na' de'e liczə chi'ichgua yichja' gaquələna' beṇə' yašə' ca'.

#### **Pabən' gwdilə' Bedən' Antioquian'**

<sup>11</sup>Na' gwdechlə gwyə'a Antioquian'. Na' žlac zoa' na' bidə Bedən' gan' nitə' beṇə' ca' chəsə'ədopə chəsə'əžag chso'elaogüie'e Cristən' na' gwdila'ane' can' chone', chedə' bla'alaon chone' de'e mal. <sup>12</sup>Quingan' goquə catə' ze'e bžine' Antioquian', gwzolaogüie' che'ej chaogüie' txen len beṇə' ca' chso'onlilažə' Cristən'

la'anə'əczə cui zjənaque' beṇə'  
 Izrael, pero gwdechłə catə' besə'əžin  
 beṇə' Jerosalen ca' beṇə' ca' bselə'  
 Jacobən', bitoch gone'ene' ye'ej  
 gaogü'e' txen len beṇə' ca' cui  
 zjənaquə beṇə' Izrael. Bžebe' bi  
 yesə'əna beṇə' ca' chso'on xbab de  
 que notə'ətezə beṇə' chonlilažə'  
 Cristən' cheyalə' soe' seņy de'en ne'  
 sirconsision. <sup>13</sup>Nach beṇə' Izrael ca'  
 yełə' nitə' Antioquian' chso'onlilaže'e  
 Cristən' leczə besyə'əbiže'e cuich  
 əgwse'ej əgwsa'ogü'e' txen len beṇə'  
 ca' cui zjənaquə beṇə' Izrael, na'  
 gosə'əgo'oyełe'e Bernaben' par niçh  
 lencze' bebize'e. Na' besyə'əbiže'e  
 parzə niçh yesyə'əbei beṇə'  
 Jerosalen ca' lega'aque', la'anə'əczə  
 gosə'əneze'e' naquən güen əse'ej  
 əsa'ogü'e' txen len beṇə' ca' cui  
 zjənaquə beṇə' Izrael. <sup>14</sup>Gocbełida'  
 bitoch chso'one' can' cheyalə' gon  
 chio'o nombi'acho dižə' güen  
 dižə' cobə de'en chzejni'in che  
 Cristən' na' de'en naquə de'e li. De'e  
 na'anə' gwdiłə' Bedən' lao yoguə'  
 beṇə' ca' chesə'ədopə chesə'əžag  
 chso'elaogü'e'e Cristən', goža'ane':  
 "Le' naco' beṇə' Izrael, pero  
 bagwlejiçhjo' costombr che chio'o  
 beṇə' Izrael par chono' txen len beṇə'  
 ca' cui zjənaquə beṇə' Izrael. De'e  
 na'anə' bito cheyalə' gono' byen  
 so'on beṇə' ca' cui zjənaquə beṇə'  
 Izrael can' na costombr che chio'o  
 beṇə' Izrael."

**Con beṇə' chso'onlilažə' Jesocristən'  
 zjənaque' beṇə' güen lao Diozən'**

<sup>15</sup>Neto' goljəto' naquəto' beṇə'  
 Izrael, na' bito goljəto' entr  
 beṇə' ca' cui chso'elao' Diozən'.  
<sup>16</sup>Diozən' bito əne' de que naccho

beṇə' güen laogü'e'enə' por ni che  
 bi de'en choncho. Con beṇə' ca'  
 chso'onlilažə' Jesocristən' zjənaque'  
 beṇə' güen lao Diozən'. Lenczə neto'  
 bachonlilažə'əto' Cristən' par niçh  
 Diozən' ne' cheto' de que banaquəto'  
 beṇə' güen laogü'e'enə'. Bito ne'  
 ca' che notə'ətezcho por ni che šə  
 choncho bi de'en na lein' goncho.

<sup>17</sup>Na' notə'ətezə chio'o naccho  
 beṇə' Izrael, antslə ze'e əṇa  
 Diozən' de que naccho beṇə' güen  
 laogü'e'enə', bzejni'ine' chio'o de  
 que tozə ca beṇə' malən' naccho  
 len yeziquə'əchlə beṇə' güen  
 de'e mal ca', pero la'anə'əczə  
 bzejni'ine' chio'o de que tozə  
 ca beṇə' malən' naccho len  
 yeziquə'əchlə beṇə' güen de'e mal  
 ca' bito əṇacho de que Crist nan'  
 bene' par niçh naccho beṇə' mal.  
 Na' šə can' chaquecho lechguaje  
 clelən' choncho xbabən'. <sup>18</sup>Chio'o  
 babechojcho xni'a costombr ca'  
 de'en zjənyoj le'e lei chechon' na' šə  
 yozo cuincho xni'aga'aqueinə' de'e  
 yoblə, le'e nacbja'ate de que de'e  
 malən' choncho. <sup>19</sup>Lein' chzejni'in  
 chio'o de que naccho beṇə' mal  
 par niçh nezecho bito naccho beṇə'  
 güen lao Diozən' por ni che de'en  
 choncho bi de'en na lein'. Na' na'a  
 chio'o chonlilažə'əcho Cristən'  
 con yo'o yiçhjocho sotezə socho  
 gwzenagcho che Diozən'. <sup>20</sup>Nada'  
 nezdə' de que ndil' ngoda'a txen len  
 Cristən' catə'ən gwso'ote'ene' le'e  
 yag corozən'. Na' bitoch zoa' to  
 gwłaza' sino Cristən' zolene' nada'.  
 Na' de'en chona' na'a chona'an  
 con can' na Xi'in Diozən' ben'  
 chonlilaža'a. Le'n' chaquene' checho  
 na' bnežjw cuine' gwso'ote'ene' por

ni checho. <sup>21</sup>Diozən' n̄zi'ilaže'e chio'o na' bsele'e Cristən' par niçh gonlilažə'əchone' na' gaccho beṇə' güen lao Diozən'. Na' bito che'enda' gwzoa' ca'alə de'en bene' ca', gaquəda' de que por ni che bi de'en chona' naca' beṇə' güen lao Diozən'. Žalə' por ni che de'en choncho bi de'en na lein' əna Diozən' de que naccho beṇə' güen laogüe'enə' bito byažjən əgwnežjo cuin Cristən' por ni checho žalə' ca'.

**Naccho beṇə' güen lao Diozən'  
chedə' chonlilažə'əcho Cristən',  
caguə por ni che de'en choncho  
complir can' na lein'**

**3** Le'e beṇə' Galasia, n̄chol yichjla'ažda'olen' ca de'en baboso'oxoayag beṇə' le'e par chaquele cheyalə' naole costomb' ca' de'en na lein'. Clar juisy babzejni'ida' le'e can' gwso'ote' Cristən' le'e yag corozən' por ni checho. <sup>2</sup>De'e ngazən' chnabda' le'e: ¿Ezo Spirit che Diozən' lo'o yichjla'ažda'olen' por ni che de'en chonle complir can' na lein'? Bito, sino zon lo'o yichjla'ažda'olen' por ni che de'en bachonlilažə'əle Cristən'. <sup>3</sup>Spirit che Diozən' zon lo'o yichjla'ažda'olen' dezd catə'an gwzolao chonlilažə'əle Cristən'. Na'alje ¿əde'e tant n̄chol yichjla'ažda'ole na'anə' chaquele chyažjən so seṇyən' lao cuerp chelen' par yeyož gonle can' chene'e Diozən'? <sup>4</sup>De'e zan de'e baboso'oçhi' boso'osaguə' beṇə' le'e laogüe de'en chonlilažə'əle Cristən'. Na' ¿bixa parən' bguo'ole bchejlažə'əle len de'e ca' šə n̄a'a sole seṇy de'en ne' sirconsision?

Pero bitolja əṇacho de que sole seṇyən', la' šə solen cuejyichjle de'en chonlilažə'əle Crist na'anə'. <sup>5</sup>Nezczele de que Diozən' babene' Spirit che'enə' zon lo'o yichjla'ažda'olen' na' chone' miłagr entr le'e, chedə' bachonlilažə'əle Cristən' na' bachzenagle che', caguə chac ca' por ni che de'en chonle complir bi de'en na lein'.

<sup>6</sup>Na' ca'aczən' nyoj Xtižə' Diozən' cho'en dižə' che de'e Abraannə' nan de que benlilaže'e Diozən' na' de'e na'anə' Diozən' gwne' che' de que naque' beṇə' güen laogüe'enə'. <sup>7</sup>Cheyalə' ənezele de que yoguə' beṇə' chso'onlilažə' Diozən' can' benlilažə' de'e Abraannə' le', lao Diozən' zjənaque' xi'in dia che de'e Abraannə'. <sup>8</sup>Diozən' bsi'e xneze par niçh chone' len le'e cui nacle beṇə' Izrael can' chone' len neto' beṇə' Izrael, ca de'en ne' che notə'ətezcho chonlilažə'əchone' de que naccho beṇə' güen laogüe'enə'. De'e na'anə' gože' de'e Abraannə' dižə' güen dižə' cobə nga: “Gona' güen len beṇə' ca' ža' yoguə' n̄asyon, beṇə' ca' so'onlilažə' nada' can' chonlilažo'o nada'.” <sup>9</sup>Na' can' naquən, Diozən' chone' güen len beṇə' ca' chso'onlilažə' le' can' bene' güen len de'e Abraannə' por ni che de'en benlilažə' de'e Abraannə' le'.

<sup>10</sup>Na' notə'ətezə beṇə' chon xbab de que gague' beṇə' güen lao Diozən' por ni che šə chone' bi de'en na lei de'en bzoj de'e Moisezən', de'e mal juisy gaquə che' šə ca', chedə' notono no yesə'əzoi par so'one' cayaṇə'an nanṇə'. Can' nyoj Xtižə' Diozən' nan: “De'e

mal juisy gaquə che notə'ətezə beṇə' šə cui n̄itə'ətezə n̄ite'e so'one' complir yoguə'əloḷ can' na lein' dote tyemp." <sup>11</sup>Na' Xtižə' Diozən' nyojən nan: "Diozən' ne' che beṇə' chso'onl̄ilažə' le' de que zjənaque' beṇə' güen laogüe'enə', na' de'e na'anə' guatə'əczə yeḷə' mban chega'aque' zejlicane." Na' de'en nan ca' nezecho de que Diozən' bito əṇe' che notə'ətezcho de que naccho beṇə' güen laogüe'enə' por ni che šə choncho bi de'en na lein' goncho. <sup>12</sup>Beṇə' zan chsa'aquene' so'one' can' na lein' sin cui chso'onl̄ilaže'e Diozən', con yo'o yichjga'aque' de'en nan: "Notə'ətezə beṇə' chon cuaselḷol can' na lein' gaquə bane' zejlicane."

<sup>13</sup>Cristən' gwdixjue' xtolə'əchon' par nič ca' cui gaquə de'e mal juisy checho ca de'en cui chzoicho par goncho cuaselḷol can' na lein'. Bnežjw cuine' goc de'e mal juisy che' lgu'a chio'o. Goc che' can' nyojən nan: "De'e mal juisy chac che notə'ətezə beṇə' chso'ote' choso'ode'ene' le'e yag." <sup>14</sup>Goc ca' par nič lenczə beṇə' ca' cui zjənaquə beṇə' Izrael so'onl̄ilaže'ene' na' n̄ite'e mbalaz ca mbalazən' gwzo de'e Abraannə' laogüe de'en benl̄ilaže'e Diozən'. Na' chio'o chonl̄ilažə'əcho Jesocristən' ža, Diozən' bsele'e Spirit che'enə' zon lo'o yichjla'ažda'ochon' can' bene' lyebe.

**Lei de'en bzoj de'e Moisezən'  
na' lyebe de'en ben Diozən'  
len de'e Abraannə'**

<sup>15-16</sup>Ca naquə Diozən' bene' lyebe len de'e Abraannə' can' gone' güen

len xi'in dia che'enə', be'e dižə' che tozə xi'in dia che de'e Abraannə', na' che Crist nan' be'e dižə'an ca'. Beṇə' bišə', quingan' naquən len notə'ətezə beṇə' choso'ozə' yiš, catə' babeyož boso'oze'en bito gaquə əṇa toe' de que cui gone' can' nannə' na' bito gaquə gwzanch yetoe' can' nannə'. <sup>17</sup>Na' lyebe de'en ben Diozən' len de'e Abraannə' ža, gwxaquə'əleben ca to yiš de'en choso'ozə' beṇə', chedə' la' Diozən' bito gwš'e' can' bene' lyebe len de'e Abraannə'. Ne'e choncze' con can' gože'ene'enə'. Na' bagwde tap gueyoa šichoa iz ben Diozən' lyebe len de'e Abraannə' nach bene' par nič bzoj de'e Moisezən' lei che'enə'. Na' la'aṇə'əczə Diozən' bnežjue' lein' bito ənacho cuich chone' can' bene' lyebe len de'e Abraannə'. <sup>18</sup>Žalə' Diozən' ne' de que beṇə' ca' chso'on cuaselḷol can' na lein' zjənaque' beṇə' güen, bito chaclene' beṇə' can' bene' lyebe gaquəlene' žalə' ca'. Pero cuine'en ne' che chio'o chonl̄ilažə'əchone' de que naccho beṇə' güen laogüe'enə' por ni che lyebe de'en bene' len de'e Abraannə'.

<sup>19-20</sup>Leeczə byažje lei de'en bzoj de'e Moisezən'. Diozən' bnežjue'en par beṇə' ca' gwnitə' bedote catə'an cuiṇə' yidə Cristən' par nič gwsa'acbe'ine' de que chso'one' contr can' non Diozən' mendad so'one'. Cristən' golje' lao dia che de'e Abraannə' na' che le'enə' be' Diozən' dižə' catə'an bene' lyebe len de'e Abraannə'. Na' ca naquə lein' Diozən' bene' par nič angl ca' boso'onežjue'en de'e Moisezən'. Na' Diozən' bchine' de'e Moisezən'

par bzejni'ine' beṇə' Izrael ca' can' na lein'. Pero catə' ben Diozən' lyebe len de'e Abraannə' notono no bchine' par əgwzejni'ine' de'e Abraannə'.

**Lein' chzejni'in chio'o de que choncho de'e mal**

<sup>21</sup>Na' bito cheyalə' goncho xbab de que lei de'en bzoj de'e Moizezən' chonən contr can' non Diozən' lyebe gone'. Pero lein' bito gaquə yocobən yichjla'ažda'ochon'. Žalə' gaquə yocobən yichjla'ažda'ochon' gwaquə goncho can' na lein' nach gaccho beṇə' güen lao Diozən' žalə' ca'.

<sup>22</sup>Pero Xtižə' Diozən' de'en nyojən nan de que yoguə'əloj beṇəchən' yesə'əzi'e castigw zejlicane por ni che xtolə'əga'aque'lenə'. Na' nyojən ca' par ničh con beṇə' so'onjilažə' Jesocristən' bito yesə'əzi'e castigon', sino gaquə güen čhega'aque' can' ben Diozən' lyebe len de'e Abraannə'.

<sup>23</sup>Ca naquə neto' beṇə' Izrael catə'ən bitonə' əgwzejni'i Diozən' neto' de que cheyalə' gonjilažə'əto' Cristən', nchoglaon čheto' de que si'ito' castigw zejlicane čhedə' nombi'ato' lei de'en bzoj de'e Moizezən' na' bito chonto' can' nanə'. <sup>24</sup>Par neto' lein' gwxaquə'əleben ca to mos əznia beṇə' chgüia chye' xi'in beṇə', de'e zan de'e che'ebo' gombo' na' de'e cui gombo'. Pero na'a babidə Cristən' na' baltezəto' chonjilažə'əto'one' Diozən' ne' de que naquəto' beṇə' güen laogüe'lenə' na' can' ne' che notə'ətezcho.

<sup>25</sup>Na' de'en babidə Cristən' bitoch gwxaquə'əlebe lein' ca to mos

əznia par neto' beṇə' Izrael, neto' bachonjilažə'əto'one'.

<sup>26</sup>Yoguə' chio'o chonjilažə'əcho Jesocristən' naccho xi'in Dioz. <sup>27</sup>Na' notə'ətezcho šə bagwchoacho nisən' par blo'echo de que ngodə'əcho txen len Jesocristən', bachzolao chac yichjla'ažda'ochon' can' naquə yichjla'ažda'ogüe'lenə'. <sup>28</sup>Na' tozəczə can' zaquə'əcho lao Diozən' šə naccho beṇə' Izrael o šə cui naccho, šə naccho beṇə' esclabo o šə cui naccho, na' šə naccho beṇə' byo o šə naccho no'olə. Yoguə'əcho banaccho tozə laogüe de'en ngodə'əcho txen len Jesocristən'.

<sup>29</sup>Na' de'en ngodə'əcho txen len Jesocristən', lao Diozən' naccho xi'in dia che de'e Abraannə' na' len chio'onə' gon Diozən' güen can' bene' lyebe gone' len xi'in dia che de'e Abraannə'.

**4** To beṇə' gwni'a šə zo xi'ine', bi'inan' si' byen čhe'lenə'. Pero na' žlac ne'e nacbo' bidao' bito nacho mbalazəch chac čhebo' cle ca che to mos la'anə'əczə gwžin ža gaquə lao na'abo' yoguə' de'en de che xabo'onə'. <sup>2</sup>Beṇə' ca' nitə' lo'o yo'o ližbo'onə' ne'e choso'ogüia choso'oye'ebo' na' ne'e chesə'ənabi'ebo' žlac cuiṇə' čha'obo' na' žlac əžin ža co'o xabo'onə' lao na'abo' de'en deine'lenə'. <sup>3</sup>Can' goquə len neto' beṇə' Izrael, žlac cuiṇə' yidə Cristən' gwxaquə'əlebetə' ca xi'in beṇə' gwni'anə'. Diozən' bene' mendad naoto' yoguə'əloj costombr de'en na lein'. Na' de'e na'anə' par neto' lein' gwxaquə'əleben ca beṇə' ca' chəsə'ənabia' xi'in beṇə' gwni'anə' žlac cuiṇə' žin ža si'ibo'

de'en de che xabo'onə'. <sup>4</sup>Pero catə' bžin ža bžia Diozən' bia' bsele'e Xi'ine'enə' yežlyo nga, gwxa'n to no'olə le'. Na' Xi'in' Diozən' leczə bzenague' che lein'. <sup>5</sup>Na' le'enə' bedəyene' par ničh yoguə' chio'o chonlilažə'ačhone' zocho mbalaz ca mbalazən' so xi'in' beṇə' gwni'anə' catə'ən əžin ža gaquə' lao na'abo' byennə'. Cristən' bedəyene' par ničh nezecho bitoch chonən byen naocho costombr ca' de'en zjənyoj le'e lei che neto' beṇə' Izrael.

<sup>6</sup>Na' de'en bagwcua' Diozən' chio'o ca xi'ine', babselē'e Spirit che'enə' zon lo'o yichjla'ažda'ochon' de'en leczə naquə' Spirit che Xi'ine' Cristən'. Na' Spiritən' chaclenən chio'o par ničh cholgüižcho Diozən' che'echone': "Xa." <sup>7</sup>Diozən' bagwcue'e chio'o ca xi'ine' caguə par cue'e yichjcho costombr ca' de'en non lein' mendad. Gwcue'e chio'o ca xi'ine' par ničh chac güen checho can' bene' lyebe gaquə che xi'in' dia che de'e Abraanṇə'.

**Pabən' chi' yichje' naquən' chso'on beṇə' ca' chso'onlilažə' Cristən'**

<sup>8</sup>Antslə catə'ən cuinə' gombi'ale Diozən' gwyejni'alažə'əle bi de'e ca' cui zjəzaquə' par šejni'alažə'əcho, na' lega'aquən gosə'anabi'an xbab chelen'. <sup>9</sup>Pero na'a banombi'ale Diozən' o šə güench əṇacho de que Diozən' banombi'e le'e. Chebanhgüeida' chele de'en chebiguə'əle gosxanlə na' bachezo cuinle xni'a costombr ca' che biquə' de'en ye'ej gaocho, che ža ca', na' che cuerp chechon'. Costombr ca' bito gwsa'aquən par yesyə'əbejən chio'o xni'a de'e malən' na' leczə

caguə bi zjəzaquə'ən na'a par əsa'aclenən chio'o. <sup>10</sup>Bagwzolaο naole costombr che neto' beṇə' Izrael che lni ca', che ža ca', che bio' ca', che tyemp ca' na' che iz ca'. <sup>11</sup>Chžeba' šə cuich əgwzenagle che de'en babsed blo'ida' le'e, la' šə cuich gwzenagle chei, cuiayi' de'en beṇə' entr le'e.

<sup>12</sup>Beṇə' bišə', chatə'əyoida' le'e gonle can' babena' nada' de'en babchojyichja' costombr che neto' beṇə' Izrael de'en zjənyoj le'e lein' ničh zoa' chona' žin entr le'e: Na' ca naquə' bedəsoa' len le'e bito nacho de que babenle mal len nada'. <sup>13</sup>Nezczele chacšenda' de'en bida' de'e neche, na' gwdixjui'a dižə' güen dižə' cobə de'en chzejni'in che Cristən' len le'e. <sup>14</sup>Na' de'en chacšenda' ca orən' zaquə'ən par gue'ile nada', pero bito bgue'ile nada', sino bzenagczle xtižə'anə'. Na' do yichj do lažə'əle bgüialaole nada' ca'aczə chgüialaogüe to angl che Diozən' o ca'aczə cuin Jesocristən'. <sup>15</sup>Mbalaz gwzole de'en benle ca' len nada', na' žbixchen' cuich chonle ca' na'a ža? Nezda' de'e tant goquele chia' xte bebeile bzanele bitə'ətezə de'en deile na' lente cuinle par goclenle nada'. <sup>16</sup>žEpor ni che de'en cho'elena' le'e dižə' lin' bachaquele de que naca' beṇə' contr chele ža?

<sup>17</sup>Beṇə' ca' choso'osed choso'olo'i le'e na'a lechgualē zjəchi' yichjga'aque' le'e, pero caguə par ničh so'one' güen len le'enə' sino par ničh yesyə'əbeje' le'e cuich gonle txen len neto'onə' na' par ničh cue'e yichjle lega'acze'enə'. <sup>18</sup>Naquəczən



güen yesə'əbe'eyichj beṇə' le'e do tyempte, caguə catə'əzən' zoa' len le'e na' con šə so'one' güen len le'e. <sup>19</sup> Xi'indaogua'a, de'e yoblə chžaglaogua'a lo'o la'ažda'ogua'anə' por ni che le'e can' chžaglaog to no'olə beṇə' chzan, na' əžaglaochcza' xte catə'əch gaquə yichjla'ažda'olen' can' naquə yichjla'aždao' Cristən'. <sup>20</sup> Žalə'əšga zoa' len le'e ṇa'a, nža'alə can' gaquə ṇia' le'e. De'e li lechguəle chaczejlaža'a chele.

#### De'e Agar na' de'e Sarən'

<sup>21</sup> Le'e chene'ele ṇaole costombr che neto' beṇə' Izrael de'en zjənyoj le'e lei de'en bzoj de'e Moizezən', žəbitonə' yenele can' na de'en nyojənnə'? <sup>22</sup> Nan de que gwnitə' čhopə xi'in de'e Abraannə' bi'i byo, tobo gwxaṇ to no'olə naquə esclabo che' na' yetobo' gwxaṇ no'ol checze' no'olən' bito naquə esclabo. <sup>23</sup> Na' bi'in gwxaṇ no'olə esclabon' goljbo' čhedə' gwzolen de'e Abraannə' le' pero bi'in gwxaṇ no'ol checze' goljbo' čhedə' Diozən' bene' par ničh goc complir can' bene' lyebe de que sane' la'anə'əczə naque' beṇə' güiž. <sup>24</sup> Na' de'en goc che no'ol ca' chzejni'in chio'o che čhopte lyebe de'en ben Diozən' naclən' gaquəlene' beṇə' Izrael ca'. No'olə esclabo ben' le Agar gwxaquə'əlebene' ca lei de'en ben Diozən' mendad bzoj de'e Moizezən'. Bzoje'en par de'e xaxta'o neto' beṇə' Izrael lao ya'a Sinain' beṇə' ca' gwxaquə'əlebe ca esclabos. <sup>25</sup> Na' doxen ṇasyon Izraelən' gwxaquə'əleben ca de'e Agarən' no'olə esclabo che de'e Abraannə'.

Diozən' bnežjue' de'e xaxta'oto' ca' lein' lao ya'a Sinain' gan' nzi' Arabia, na' xte ža ṇeža beṇə' Izrael gwlaž čheto' ca' zjənaque' ca esclabos čhedə' chsa'aquene' chonən byen yesə'ənaogüe' yoguə' costombr ca' de'en na lein'. <sup>26</sup> Pero yoguə' chio'o chonlilažə'əcho Cristən', babozoe' chio'o binlo len Diozən', na' naquən to goclen de'en bene'. De'e na'anə' ṇezecho bito chonən byen ṇaocho costombr ca' de'en na lein'. <sup>27</sup> Diozən' bene' par ničh to profet beṇə' be' xtiže'enə' cana' bzoje'en de que beṇə' zanch so'onlilažə' Cristən' cle ca beṇə' ca' yesə'ənao costombr ca' de'en na lein'. Na' quinga na de'en bzoje'enə'. Bebei no'olə güiž, no'olə cui no chzan, Bisy'a yelə' chebei chio', le' cuiṇə' gaco' bes che yelə' sanṇə', čhedə' sano' bi'i zan. Na' le' cui no xi'inə' ṇe'e so, Nītə'əch xi'inə' clezə can' nitə' xi'in no'olən' bagwxaṇ to xi'in be'en čhio'onə'.

<sup>28</sup> Ca naquə Isaaquən' xi'in de'e Abraannə' goljbo' por yelə' guac che Diozən' čhedə' can' bene' lyebe len de'e Abraannə'. Le'egatezə ca' chio'o ža, por yelə' guac che Dioz na'anə' bachone' chio'o cuent ca xi'in dia che de'e Abraannə' čhedə' can' bene' lyebe gone'. <sup>29</sup> Bi'i che de'e Agarən', bi'in goljə por ni che de'en gwzolen de'e Abraannə' le' blagzejə blagzidbo' Isaaquən' bi'in ben Spirit che Diozən' par gwxaṇ de'e Sarən' no'olən' goquə beṇə' güiž. Le'egatezə ca' ža ṇeža beṇə' Izrael ca' chesə'ənao costombr ca' de'en na lein'

choso'olagzejə choso'olagzide'  
 chio'o chonlilažə'əcho Cristən'.  
<sup>30</sup>Na' Xtižə' Diozən' de'en nyojən  
 nan de que Diozən' gože' de'e  
 Abraannə': "Bebej no'olə esclabon'  
 len bi'i che'enə', chedə' bi'i  
 che'enə' bito əgwnežjua'abo' de'en  
 nona' lyebe əgwnežjua' bi'in  
 gwxa no'ol chio'onə'." <sup>31</sup>De'e  
 na'anə' beņə' bišə' nezecho laogüe  
 de'en chonlilažə'əcho Cristən'  
 gwxaquə'əlebecho ca xi'in de'e  
 Sarən' no'olən' bito goquə esclabo,  
 caguə ca xi'in de'e no'olə esclabon'.

**Bito chonən byen naicho  
 costombr de'en na lein'**

**5** Catə'an benlilažə'əcho  
 Cristən' le' bebeje' chio'o lao  
 yoguə' de'en choncho chaquecho  
 chebei Diozən' chio'o laogüe de'en  
 chonchon'. De'e na'anə' bito ənacho  
 yebeiche Diozən' chio'o šə naicho  
 costombr ca' can' na lei che neto'  
 beņə' Izrael.

<sup>2</sup>Nada' Pab əchnia' le'e  
 to de'e žialao. Šə sole seņy  
 de'en ne' sirconsisionə' na'a  
 bachonlilažə'əle Cristən', bito  
 bibi zaquə'an de'en bagwzolao  
 chonlilažə'əlene' šə ca'. <sup>3</sup>Echnia'  
 clar de que notə'ətezə beņə' soe'  
 seņy de'en ne' sirconsision, leczə  
 cheyalə' gone' complir yoguə'əlol  
 bitə'ətezəchlə de'en na lein'. <sup>4</sup>Na'  
 šə chaquele gonle cuaselol can' na  
 lein' par nič gacle beņə' güen  
 lao Diozən', bachzole Cristən'  
 ca'alə šə can' chaquele, na' bitoch  
 chonle cas can' nži'ilažə' Diozən'  
 chio'o. <sup>5</sup>Chio'o chonlilažə'əcho  
 Jesocristən' zo Spirit che Diozən'  
 lo'o la'ažda'ochon' na' chonən ca

baņezecho de que Diozən' ənə'  
 naccho beņə' güen laogüe'enə'  
 catə' yežincho gan' zoe'enə'. <sup>6</sup>Ca  
 naquə chio'o chonlilažə'əcho  
 Jesocristən' bito bi nonən len  
 Diozən' šə socho seņy de'en ne'  
 sirconsision, o šə cui zochon. La'  
 de'en naquə de'e žialao xen len  
 Diozən', sotezə socho gonlilažə'əcho  
 Cristən' na' gaquecho che  
 ljuežjcho par nič gacbia' de que  
 chonlilažə'əchone'enə'.

<sup>7</sup>To tyemp babenle can' chebei  
 Diozən', pero na'a chebanda'  
 babe'ele latjə chəsə'əžon beņə'  
 cuich naole de'en naquə de'e lin'.  
<sup>8</sup>Dioz ben' gwlej le'e par nacle  
 xi'ine', bito nacho le'enə' chone' par  
 nič chzenagle che beņə' ca'. <sup>9</sup>Na'  
 de'en bachzenagle che consejw  
 malən' yobəch əgwzenagle che  
 bitə'ətezəchlə de'e chon contr xtižə'  
 Diozən'. Chonle can' na dicho nga:  
 "Latə'əzə xna' cuazin' chonən par  
 nič cheyas doxen cuazin'." <sup>10</sup>Pero  
 na' zoa' lez gon Xancho Jesocristən'  
 par nič yezolao naole de'e ca'  
 babzejni'ida' le'e. Na' notə'ətezə  
 zjənaquə beņə' ca' chso'on par nič  
 chaczejlažə'əle, Diozən' əgwnežjue'  
 castigw chega'aque'.

<sup>11</sup>Na' ca naca' nada', nitə' beņə'  
 chəsə'əne' chsed chlo'ida' de que  
 yoguə' chio'o chonlilažə'əcho  
 Cristən' cheyalə' socho seņy de'en  
 ne' sirconsision. Bitolja zjənlagzejə  
 zjənlagzidə beņə' nada' žalə' chsed  
 chlo'ida' ca'. Len bito gaquə zdebə  
 no gwzenag žalə' ca', chedə' bitoch  
 gonən byen so'onlilažə'e Cristən'  
 ben' gwso'ote' boso'ode'ene' le'e  
 yag corozən'. <sup>12</sup>Yebeichləda'  
 žalə' beņə' ca' chso'on par

nich chaczejlažə'əle šə chebei  
Diozən' le'e de'en cui zole señyən'  
yesə'əchog cuinga'aque' yelatə'.

<sup>13</sup>Beṇə' bišə', Diozən' gwleje'  
chio'o par chonlilažə'əcho Cristən'.  
De'e na'anə' bitoch chonən byen  
naocho costombr ca' can' na lei che  
neto' beṇə' Izrael. Pero bito de lsens  
goncho bitə'ətezə de'e mal de'en na  
la'ažda'omalchon' goncho. De'en  
chene'e Diozən' goncho, gaque che  
ljuežjcho na' gaquəlen ljuežjcho  
tocho yetocho. <sup>14</sup>Na' bazoczcho  
choncho yoguə'əlo' can' na lein' šə  
choncho can' nyojən nan: "Goque  
che sa'aljuežjo' catg chaque che  
cuino'." <sup>15</sup>Pero šə chacyožə ljuežjcho  
o chdiləlen ljuežjcho chziayi'icho  
de'en non Diozən' par naccho tozə.

**Can' goncho šə gwzenagcho  
che Spirit che Diozən'**

<sup>16</sup>De'en naquə de'e žialao xen  
goncho, cheya'ə' sotezə socho  
goncho can' chene'e Spirit che  
Diozən'. Na' šə goncho ca' bito  
gwzenagcho che la'ažda'omalchon'.  
<sup>17</sup>Catə' chzenagcho che  
la'ažda'omalchon' bito cho'en  
latjə əgwzenagcho che Spirit  
che Diozən'. Na' ca naquə de'en  
chene'e la'ažda'omalchon' goncho  
naquən contr de'en chene'e Spirit  
che Diozən'. Pero šə choncho can'  
chene'e Spirit che Diozən', bito  
choncho can' na la'ažda'omalchon'.  
Na' de'en zo Spiritən' len chio'o  
bito choncho can' goncho žalə' cui  
zon len chio'o. <sup>18</sup>Na' šə chzenagcho  
che de'en chsed chzejni'i Spirit  
che Diozən' chio'o goncho, bitoch  
naocho costombr ca' de'en na lei  
de'en bzoj de'e Moisezən'.

<sup>19</sup>Šə chzenagcho che  
la'ažda'omalchon' choncho  
notə'ətezən de'e mal quinga:  
Chbejyichjcho no'ol checho o be'en  
checho par chzolencho beṇə' yoblə;  
chgo'o xtocho; chebeicho bichlə  
de'e yelə' zto' de'en zjənac ca';  
<sup>20</sup>chejni'alažə'əcho lgua'a lsaquə';  
naocho de'en chso'on beṇə' ca'  
chesə'ənelen de'e xio'; bito zocho  
binlo len ljuežjcho; chdilə chšašcho;  
chgue'i ljuežjcho; chloccho; chi'  
yichjcho gaquə güen che cuinzcho  
sin cui choncho xbab nac gaquə  
che ljuežjcho; naccho beṇə' goti';  
bito choncho txen len ljuežjcho;  
<sup>21</sup>chzelažə'əcho bi de'en de che  
beṇə' yoblə; chotcho beṇə'; naccho  
beṇə' güe'e zo; chlencho no lni gan'  
chac scandl; na' choncho bichlə  
de'e mal de'en zjənaquə ca de'e mal  
quina bagwnia'. Na' de'e yoblə  
chnia' le'e can' bagwnia'acza' antslə,  
bito yežincho yoban' gan' zo Diozən'  
chnabi'e šə choncho de'e mal ca'  
zjənac ca'.

<sup>22</sup>Na' šə chzenagcho che Spirit  
che Diozən', goncho yoguə' de'e  
quina: Gaquecho che ljuežj  
beṇə'chcho; socho mbalaz de'en  
nombi'acho Diozən'; socho  
binlo len xbab de'en yo'o lo'o  
yichjla'ažda'ochon'; gapcho  
yelə' chxenlažə' len ljuežj  
beṇə'chcho bitə'ətezə de'en  
chso'onene' chio'o; goncho  
güen len beṇə' yeziquə'əchlə  
na' əži'ilažə'əga'acchone';  
goncho complir šə bin' ye'echo  
beṇə' goncho; <sup>23</sup>gaccho beṇə'  
gaxjwlažə'; bito güe'echo latjə  
nabia' la'ažda'omalchon' chio'o.  
Na' šə bachzenagcho che Spirit

che Diozən', bito bi bi lei de de'en əna choncho de'e mal. <sup>24</sup>Na' chio'o bangodə'əcho txen len Cristo Jeso'osən' bitoch cho'echo latjə ɲabia' la'ažda'omalchon' chio'o par goncho bi de'en chzelažə'ən.

<sup>25</sup>Spirit che Diozən' babenən yelə' mban zejlicane chechon', na' de'e na'anə' cheyalə' socho goncho can' chene'ennə'.

<sup>26</sup>Na' bito cheyalə' gon cuincho xen gaquecho lechgualə chebei Diozən' chio'o, la' šə goncho ca' yesə'əža'a benə' ljuežjchon' chio'o na' yesə'əgue'ine' chio'o.

#### Cheyalə' gaquəlen ljuežjcho

**6** Benə' bišə', šə to benə' ljuežjchon' babxope' bene' to de'e mal, chio'o chzenagcho che Spirit che Diozən' cheyalə' gaquəlenchone' par niç yezoe' binlo len Diozən' de'e yoblə. Na' güe'echone' consejw dižə' šao' əžjsa'alažə'əcho de que lecəzə ca' chio'o nxož əxopcho goncho de'e malən'. <sup>2</sup>To tocho cheyalə' gaquəlen benə' ljuežjcho ca' bitə'ətezə de'e chsa'ac chega'aque'. Šə goncho ca' goncho complir can' chene'e Cristən' gonchon'.

<sup>3</sup>Na' šə goncho xbab de que naccho benə' blao len cui naccho, chxoayagzə cuinchon' šə ca'. <sup>4</sup>To tocho cheyalə' goncho xbab šə de'en babenchon' naquən de'e güen o de'e mal. Na' yebeicho šə babencho de'en naquə güen, pero bito goncho xbab de que güen chon chio'o clezə ca benə' yoblə. <sup>5</sup>La' to tochon' choglaio Diozən' checho šə bencho güen o šə bencho mal.

<sup>6</sup>Šə no choso'osed choso'olo'i chio'o xtižə' Diozən', bito goncho rgiün len lega'aque'. Cheyalə' əgwnežjoga'acchone' latə' šə bi de'e šao' de'e güen de'e de checho.

<sup>7</sup>Bito güe'ele latjə no əxoayag le'e, bito gaquə əgwzocho Diozən' ca'alə. La' segon de'en chonchon' gone' par niç socho mbalaz o par niç si'icho castigw. Can' chac, con de'en chazcho nan' chelapcho. <sup>8</sup>Ben' chon con can' chene'e la'ažda'omale'enə' gwžin ža cuiayi'e zejlicane, pero ben' chon can' chene'e Spirit che Diozən', Spiritən' gonən par niç əbane' zejlicane. <sup>9</sup>Na' bito cheyalə' žjəxaquə'əlažə'əcho par goncho de'e güennə', chedə' la' gwžin ža catə' Diozən' gone' par niç socho mbalaz juisy, con šə cui cuejyichjcho goncho can' chene'ene'enə'. <sup>10</sup>Cheyalə' goncho güen len yoguə'əlo benə' batə'ətezo zo latjə, pero mazəchlə cheyalə' goncho güen len yeziquə'əchlə benə' chso'onlilažə' Cristən'.

#### Yeto chopə de'en che'

##### Pabən' lega'aque'

<sup>11</sup>Le'e güiašc letr cha'o quinga, la' cuina'an chzoja'an le'e. <sup>12</sup>Benə' ca' chso'on byen sole señy de'en ne' sirconsision chso'one' ca' chedə' chse'enene' yesyə'əbei benə' lega'aque' šə baboso'ozoe' le'e señyən'. Chso'one' byen solen par niç cui no gwlagzejə gwlagzidə lega'aque' can' choso'olagzejə choso'olagzidə benə' neto' laogüe de'en chzeneto' ca naquən' bnežjw cuin Cristən' gwso'ote'ene' le'e yag corozən' por ni checho.

<sup>13</sup>Benə' ca' zjəzo señy de'en ne'

sirconsisionnə' zjəchi' yichjga'aque' lei de'en bzoj de'e Moisezən', pero ni lega'aque' cui chso'one' can' nannə'. Con chse'enene' sole señyən' par nich əso'elao' cuinga'aque' na' yesyə'əbei beñə' lega'aque'. <sup>14</sup>Ca naca' nada', bitoczə güe'elao' cuina', na' bitobi nonən len nada' šə beñəchən' yebeine' nada'. Güe'ela'ogua'a Xancho Jesocristən' na' le'enə' che'enda' yebeine' nada'. De'en nezdə' bnežjw cuine' gwso'ot beñə' le' le'e yag corozən' por ni checho bitobi nonən len nada' šə beñəchən' yesyə'əbeine' nada'. <sup>15</sup>Nezdə' bito bi nonən šə zocho señy de'en ne' sirconsisionnə' o šə cui zochon, pero de'e zaquə'əchgüei de'en babocobə Diozən' yichjla'ažda'ochon'.

<sup>16</sup>Chio'o naccho doaljə beñə' Izrael lao Diozən' šə bachonlilažə'əcho Jesocristən' na' šə cuich naocho costombr de'en zjənyoj le'e lein'. Na' le'e šə bachi' yichjle tlaozə can' chene'ene'enə', Diozən' gonšgue' par so cuezəchle binlo len xbab de'en yo'o lo'o yichjla'ažda'olen' na' soteze' yeyašə' yeži'ilaže'e le'e.

<sup>17</sup>Na' par delant bitoch bi xbab clelə gonle che de'en babzoja' le'e. Legwzenag chia' chedə' cuerp chia'anə' nsa'an yiž che de'en baboso'ochi' baboso'osaguə' beñə' nada' por ni che de'en əchyixjui'a xtižə' Xancho Jeso'osən'.

<sup>18</sup>Beñə' bišə', Xancho Jesocristən' sotezə soe' gaquəlenšgacze' le'e len xbab de'en yo'o lo'o yichjla'ažda'olen'. De'e na'azən' chzoja' na'a. *Pab*